

[Augsburg], 15. Oktober 1556

An Johannes Oporinus

UB Basel, Fr. Gr. I 11, fol. 202r.

Steinmann Nr. 694.

Lit.: Husner S. 152.

S. P. D. Ex quo te Francofordia redijsse coniectaui, ter ad te scripsi, semel Argentinam, bis Basileam. Neque dubito quin iam acceperis quid D. Anto[nius] Fuggerus promiserit. Nempe 300 f. mutuae et 50 f. honorariae pecuniae. Quae conditio si tibi placet, 350 f. a Vilhelmo Prechtero Argentinensi accipies quando voles, missa eò syngrapha. Iam enim nomine A[ntonij] Fuggeri ad eum scriptum est, vt pecuniam tibi numeret. Zonaras autem ad Cal[endas] Martias omnino absoluendus erit. Quae mihi causa est, vt reliquas 1 tomis chartas nunc per Friburgensem tabellarium mittam, quae sunt T. 3. V. 3. X. 3. Y. 3. Z. 3. A. 4. B. 4. C. 4. D. 4. E. 4. F. 4. τέλος. et reliquias Indicis in 1. Tomum. In 2. tomo mitto Aa. 1. Bb. 2. Cc. 1. Dd. 1. Ee. 1. Ff. 1. Hh. 1. Ii. 1. et reliquos terniones vsque ad finem alphabeti et Aa. 2. et partem indicis. plura per occupationes releggere non licuit. Sed spero te totum opus intra mensem accepturum. quod mea multum interest, cùm, vt tam prolixa Crambe non repetita, sed quinques recocta, Wolfio relicto, tandem Oporino molesta sit, tum, vt ad Choniatae versionem accingar. quem si absoluere et diutius viuere licuerit, operam dabo, vt gnomologias Isocraticas et annotationes Demosthenicas absoluam. Interea feliciter exornato Zonaram nostrum, qui vtinam tam tibi sit fructuosus quam mihi molestus fuit, praesertim exigua spe gratiae ineundae aut augendae gloriae. Tandem redditii libelli tui sunt praeter seueri sacram historiam, quam Dominus meus in primis expetit. Optionem autem dedisti mihi non sanè optabilem. Malle enim me retinere, bonos praesertim libros, quam domino dare quis dubitet? sed illi dare necesse est, nisi tuae existimationi incommodare velim. Quare posthac noli de eadem fidelia duos parietes dealbare. καὶ ταῦτα περὶ τῆς τοῦ ὀπωρινοῦ μεγαλοπρεπείας καὶ ἥματοδωρίας, quam vlciscar probè. Tum enim gratias agam cum accepero. ἐν δὲ τῷ μεταξὺ χαίρειν σοὶ λέγω. τοῖς δὲ ἔχθροῖς σου κλαίειν καὶ οἰμώζειν. Vale. Idibus Octobris 1556.

Hiero[nymus] Wolfius
Tuus.

D. Carino plurimam salutem cupio.